

**Date – 08/1/2026**

**Time - 18:30 -18:40Hrs**

**AKASHVANI AIZAWL**

**REGIONAL NEWS BULLETIN**

**HEADLINES ( EVENING )**

1. Mizoram Lokayukta Sixth Annual Report 2024-2025 chu vawiin khan Mizoram Lok Ayukta Chairperson Pu Lalmalsawman Larsap Gen (Retd) Vijay Kumar Singh hnenah a hlan.
2. Chief Minister Pu Lalduhawma chuan Pang zirlaite tan Aizawl Ainawn vengah Pang Hostel sak a ni ang, a ti.
3. Enforcement Directorate (ED) te chuan sawrkar hna lem hmanga inbumna chungchangah ramchhung hmun 15 an dap.
4. Vawiin atangin ni li awh tur Somnath Swabhiman Parv lawmna chu Somnath Temple ah tan a ni.

<><><>

**LOK AYUKTA REPORT**

Mizoram Lokayukta Sixth Annual Report 2024-2025 chu vawiin khan Mizoram Lok Ayukta Chairperson Pu Lalmalsawman Larsap Gen (Retd) Vijay Kumar Singh hnenah a hlan a. Annual report hian April ni 1, 2024 leh March ni 31, 2025 inkar a huam a, Mizoram Legislative Assembly thutkhawmah pharh a ni ang.

He hunah hian Mizoram Lokayukta Chairperson Pu Lalmalsawma chuan Mizoram Lokayukta hnuai case neih dan leh bawhzui dante bakah dinhmun leh thlen chinte Larsap hi a hrih a. Larsap chuan an hmalaknate fakawm tiin, tun aia nasa zawka tan laa theihtawp chhuah chhonzawm zel turin a chah a ni.

Pu Lalmalsawma hi Lok Ayukta member 2- Pu Lalsanglura, leh Pu Joel Joseph Denga ten an tawiam a ni.

Mizoram Lokayukta Sixth Annual report-in a tarlan dan chuan kum 2024-2025 chhung khan Mizoram Lokayukta hnuai case eiruk thubuai 20 ziahluh niin heng zinga 6 te hi preliminary inquiry tura thawn a ni a. Hemi hun chhung vek hian preliminary inquiry report 8 dawn a ni a, thubuai 5 chinfel niin, thubuai 1 ah mi 2 te thiam loh chantir an ni.

March 2019 a Mizoram Lokayukta din a nih atanga vawiin thleng hian Mizoram Lokayukta hnuai case eiruk thubuai 91 ziahluh tawh a ni a. Thubuai 58 chinfel tawh niin, preliminary inquiry leh investigation kalpui mek 33 a awm baw.

Eiruk thubuai hi engtik lai pawhin a thlawn vekin Mizoram Lokayukta Office MINECO-ah lehkha pheka ziakin emaw, email - Mizoram.lokayukta@mizoram.gov.in ah thlen theih a ni a. Mahni nihna tilang duh lote chu an nihna thup sak thin a ni a, amaherawhchu Lokayukta lam atanga biakpawh theihna tur erawh dah tur a ni.

<><><>

## **UD&PA MINISTER**

UD&PA Minister Pu K. Sapdanga chuan Mizoram District khawpui hrang hrang a Storm Drain tui luankawr siam hna kalpui mek chu fir takin sawrkarin a en zui reng a ti.

He thu hi vawiina UD&PA hnuaiia Storm Drain tui luan kawr siam bakah UD&PA hnuaiia hna hrang hrang khuh-hawna hun, Planning and Programme Implementation Department Conference Hall Aizawl a neih-ah sawiin Pu K. Sapdanga chuan khawpui hmasawna hna ni satliah lo khuarel chhiatna thlen thei laka khawpui chhanhimna tura inbuatsaihna hun an hmang thei chu lawmawm a tih thu a sawi a, hmasawna hna zingah Aizawl khawpui-in a mamawh hmasa ber chu tui luan kawr tha neih a ni tiin, he hmalakna hian khuarel chhiatna hrang hrang Mizoram in a a lo tawh thin leh hriselna kawngah hmasawna nasa tak a neih tir theih thu a tarlang tel baw.

Vawiina Storm Drain tui luan kawr siam hmalakna chungchanga kal khawmte a bik takin Contractor te chu sum siamna a-nih loh-thu leh chhanhimna hna an thawh zawk thu sawiin, an hnathawh-te tha taka thawk turin a ngen tel baw. Storm Drain tui luan kawr siam hmalakna-ah hian veng-tin Local Council te chu sawrkar thawhpui turin Minister hian a sawm nghal baw a ni.

<><><>

## **CM**

Chief Minister Pu Lalduhawma chuan Pang zirlaite tan Aizawl Ainawn vengah Pang Hostel sak a ni ang, a ti.

He thu hi vawiina Vathuampui khelmual a Pang Zirlai Pawl huaihawt, Pang hnam Kut ropui ber leh ngaihhlut hlawh ber pakhat, Nau Lawm Kut-Naumariamlak Kut a hmanpui naah Chief Minister chuan sawiin, zo hnathlak hnam peng hrang hrangte zia leh tih dan chu a riralin theihnghilh a hlauhawm thu a sawi a, thangtharte chu hnam ze tha tak tak te bakah tawng leh thu leh hlate a boral loh nan tha taka humhalh thiam turin a chah baw.

Chief Minister chuan zirlai pawlte chu hnam peng hrang hrangte huikhawmtu tha tak an nih thu a sawi a, Pangfate huikhawmtu atan pawh Pang Zirlai Pawl tluka chak leh huapzo an awm loh thu a sawi baw.

Pu Lalduhoma chuan Pang hnam chu Mizo hnam zinga thlang tla hmasa pawl an nih a rinawm tih sawiin, hnam lian tak ni mahse an hnam chanchin chhiar tur a tam loh thu leh, hei hi thangthar fing zawkte chuan rawn vei a, hnam chanchin ziaka dah uar tura fuihin, Mizo hnam tobul chhui chian chu sorkar chuan tha a tih thu leh, hemi kawngah hian hmalak mek a nih thu te, Mipui nawlpui pawm tlan theih history

rintlak chhuina kawngah pawh Pang history chuan dinhmun pawimawh tak a luah hial a a rin thu a sawi bawk.

Vawiina Naumariamlak Kut a hmanpui naah hian Chief Minister chuan Mizoram chhim lam bial chu engtikah emaw chuan Mizoram kawtchhuah a nih tur thu a sawi a, Ministry of DoNER hnuai High Level Task Force on Northeast Economic Corridor-a Chairman a nih thu te, India hmarchhak ramten an hlawkpui theih inkalpawhna kawngpui tha neih theih dan tur an sawiho thin bakah KMMTTP chu Mizote chauh ni lovin Mizoram thenawm state te pawhin an nghahhlelh em em thu leh puitling thuai thuai se an duh thu a sawi.

<><><>

## LAWNGTLAI

Lawngtlai Bawrsap thahnemngaihna vanga Lawngtlai khawpuiin kawng hrang hranga hma a sawn theih nan, khawpui chhunga Veng 12 te tana inelna buatsaih, Bawrsap Award vangin Lawngtlai khawpui hmel a danglam chho tan tih Lawngtlaia kan corr chuan a sawi.

VC

*Kumtina chhonzawm tura Lawngtlai Bawrsap Pu Donny Lalruatsanga ruahmannaa siam Bawrsap Award bultanna hi kum kalta November atang khan hmalak tan a ni a, Lawngtlai khawpui Veng 12 ten an huamchhung ah faina beihpui thlakin, kawngpui kam leh Tuihawk luankawr te an thianfai a, veng mipuite hnen ah Vantlang Tlangau kaltlangin, mahni In leh a vel vawngfaia, awmzenei zawka an lirthei leh hmanrua te dah turin an ngen bawk.*

*Bawrsap Award hian Veng fai leh inenkawlina tha, Ran khuahkhirh leh Lirhei dahdan mumal te, nunphung tha inzirtirna leh midang tana hnawksak lo, zahawmtaka nunhona vawngtha te chu ngaih pawimawh hmasak a ni dawn a, kumtinin Republic Day ah Award hi hlan thin tura ruahman niin lawmman thatawktak siam a ni dawn.*

*Bawrsap Award- dawngtu tur endik turin Mizoram Journalist Association (MJA) Lawngtlai District ruat an ni a, an ni hian thlatinin Veng hrang hranga hmalakna endikin, tun dinhmun ah Lawngtlai khawpui hmel a danglam chhoh mek thu MJA hruaitute chuan an sawi.*

<><><>

## MIZO GINGER USP

Horticulture Minister Pu C. Lalsawivungan Sawrkarin loneitute hamthatna a ngaih pawimawh thu sawiin nikumah sawhthing support price atan cheng vbc 140 vel pek a ni tih a sawi.

He thu hi vawiina Horticulture Department buatsaih, Mizoramin sawhthing a tharchhuah hralh kawnga mi a hip bik theihna tur, DoNER hnuai Unique Selling Proposition chungchanga inrawnkhawmna MINECO Conference Hall a neihah sawiin Horticulture Minister chuan DoNER Minister pawhin sawhthing chungchang chu a phur pui thu leh a hring ringawt ni lova a rova hralh a nih a, man man zawka hralh a nih theih nan leh tawih ral mai mai a tlem zawk nan hmalak ni se a ti a, Mizoram sawhthing chu USP atana state sawrkarin a thlan angin DoNER pawhin a

pawmpui thu a sawi a. Horticulture Department leh Planning Department hnuai a PIME Unit tangkawpin Ministry of DoNER-ah DPR an theh luh tawh bakah cheng vbc 35 hmuh an inbeisei tih a sawi a ni.

Pu C. Lalsawivunga chuan Sawhthing thar leh ching tam ber Champhai district-ah a bul tan nan sawhthing sawngbawl hna kalpui tum a ni tih sawiin, a hmunpui chu Mualkawi a awm tura duan a ni a ti a, Zotlang, Vaphai leh Mualchengah a sawngbawl na hmun dang din tum a nih thu a sawi a. Ram ti chhe tlem zawka chin a nih theih nan department chuan Sustainable Ginger Cultivation Programme a duang tih sawi bawkin Mizo sawhthing that bikna hriain NITI Aayog chuan Mizoram chu Ginger Capital of India-ah a puang a, ‘sawhthing chin, thar leh sawngbawl chu thalaite leh a tui mite tan eizawna tha tak a ni thei dawn a ni’, a ti bawk.

Agriculture Minister Pu P.C. Vanlalruata chuan state dangte aia Mizoram sawhthing that bikna-te chawilar thiam a nih chuan sawhthing lei leh hralh kawngah pawh nasa zawka ram economy tan hlawkna a thlen ngei a beisei thu a sawi. Sawhthing sawngbawl dan chi hrang hrangte chu ngaih pawimawh a nih thu sawiin Marketing board hnuai a zirchiangtu tur Research Team din a nih thu te, ram leilung ti chhe lo tur zawng leh tha zawk leh hlawk zawka thar dante zir zel a ni a ti.

<><><>

## **ESTHER:**

Ramchunga naupang chawimawina sang ber Pradhan Mantri Rastriya Bal Puraskar 2025 dawngtu Esther Lalduhawmi Hnamte chu vawin khan Larsap Gen (Rets) Vijay Kumar Singh-an Lok Bhavan, Aizawlah lawmpuina thilpek a hlan.

Larsap chuan Esther Hnamte chu thinlung taka a lawmpui thu sawiin, a hlawhtlinna hi Mizoram mai bakah rampum tana chhuanawm tak a ni, a ti a. Hmasawn zel tuma training tha tak nei zel turin a fuih a. Thalaite tana entawntlak ni zel tura chahin a kalzelna turah duhsakna a hlan a ni.

Pradhan Mantri Rashtriya Bal Puraskar hi Ministry of Women & Child Development kaltlangin category hrang hrang 7 –a naupang chawimawi phu kum 5-18 te hnena hlan thin a ni a. Nikum khan India ram State leh UT 18 atanga naupang 20 thlan chhuahte hnenah he chawimawina hi hlan a ni a. Esther Hnamte hian Art & Culture category hnuai a Pradhan Mantri Rastriya Bal Puraskar chu President Droupadi Murmu kut atangin December ni 26 khan Vigyan Bhawan, New Delhi-ah a dawng a ni.

<><><>

## **AIR NEWS**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

## ED ON JOB SCAM

Enforcement Directorate (ED) te chuan sawrkar hna lem hmanga inbumna chungchangah ramchhung hmun 15 an dap. ED sawidanin he hna lem hmanga inbumna hi Indian Railways hminga siam a ni a. Chhui chian anih hnuah sawrkar pawl leh department 40 dang a lang bawk a ni.

ED te hian ramchhunga khawpui 13 a hmun 15 an dap a. Misual rual organized gang te thiltih nia hriat a ni a. Bihar-ah Muzaffarpur leh Motihari khawpuite ,West Bengal-a Kolkatta, Kerala-ah Ernakulam, Pandalam, Adoor, leh Kodur bakah Tamil Nadu-a Chennai khapwuite, Gujarat-a Rajkot leh Uttar Pradesh-a Gorakhpur, Allahabad leh Lucknow ah te dapchhuah beihpui an thlak a ni.



## CENSUS

Vawiin atangin ni li awl tur Somnath Swabhimani Parv lawmna chu Somnath Temple ah tan a ni a. Gujarat-a Prabhas Patan hmunah kum 1026-a Somnath Temple beih anih hmasak ber atanga kum 1000 na hi lawm a ni.

Prime Minister Narendra Modi chuan Somnath Swabhimani Parv pualin ramchhung mipuite chibai a buk a. Pu Modi chuan social media lamah mipuite chibai bukin Somnath Temple in beihna tawk fo mahse kum tam tak chung a dingchang thei a ni a ti bawk.

